



Broj: 10/1-34-047260-2/20

Tuzla, __.09.2020. godine

VLADA TUZLANSKOG KANTONA

PREDMET: Materijal za sjednicu Vlade – dostavlja se

Shodno odredbama člana 28. Poslovnika o radu Vlade Tuzlanskog kantona („Službene novine Tuzlanskog kantona“, broj: 7/05, 7/07, 11/08 i 16/13), a u vezi sa odredbom člana 78. stav (6) Zakona o izvršenju Budžeta Tuzlanskog kantona za 2020. godinu („Službene novine Tuzlanskog kantona“, broj: 16/19 i 07/20), u prilogu ovog akta, nakon pribavljenog odgovarajućeg mišljenja Ministarstva finansija Tuzlanskog kantona i ugrađenih primjedbi sa sjednice Vlade Tuzlanskog kantona na kojoj je predmetni materijal razmatran, kao radni materijal za sjednicu Vlade Tuzlanskog kantona, dostavljamo vam na razmatranje Odluku o utvrđivanju uslova, kriterija, postupka i načina isplate stipendija redovnim učenicima prvih razreda srednjih škola koji upišu zanimanje sa Liste deficitarnih zanimanja za školsku 2020/2021. godinu.

PRILOG: - kao u tekstu;

DOSTAVITI:

1 x Vlada Tuzlanskog kantona

1 x evidencija

1 x a/a

MINISTRICA

Fahreta Brašnjić, prof.

PRIJEDLOG

Na osnovu člana 5. i 29. Zakona o Vladi Tuzlanskog kantona ("Službene novine Tuzlanskog kantona" broj: 17/00, 01/05, 11/06, 13/11 i 15/17), člana 160. Zakona o srednjem obrazovanju i odgoju ("Službene novine Tuzlanskog kantona" broj: 10/20 – prečišćeni tekst) i člana 78. stav (6) Zakona o izvršenju Budžeta Tuzlanskog kantona za 2020. godinu ("Službene novine Tuzlanskog kantona" broj: 16/19 i 07/20), Vlada Tuzlanskog kantona na sjednici održanoj _____ godine, **donosi**

O D L U K U

o utvrđivanju uslova, kriterija, postupka i načina isplate za dodjelu stipendija redovnim učenicima prvih razreda srednjih škola koji upišu zanimanje sa Liste deficitarnih zanimanja za školsku 2020/2021. godinu

I - OPĆE ODREDBE

Član 1.

(Predmet)

Ovom Odlukom utvrđuju se uslovi, kriteriji i postupak za dodjelu stipendija za školsku 2020/2021. godinu redovnim učenicima prvih razreda srednjih škola koji upišu zanimanje sa Liste deficitarnih zanimanja za školsku 2020/2021. godinu, finansijska sredstva, način isplate finansijskih sredstva i korisnici istih.

Član 2.

(Korisnici prava)

Pravo na dodjelu sredstava po ovoj Odluci imaju redovni učenici prvih razreda srednjih škola sa području Tuzlanskog kantona, koji se obrazuju za zanimanja sa utvrđene Liste deficitarnih zanimanja za školsku 2020/2021. godinu (u daljem tekstu: kandidat).

Član 3.

(Finansijska sredstva)

Finansijska sredstva za dodjelu stipendija obezbjeđuju se u Budžetu Tuzlanskog kantona, a raspodjela sredstava vršit će se u skladu sa planiranim i operativnim sredstvima u Budžetu Tuzlanskog kantona za 2020. godinu, na potrošačkoj jedinici 24010026 – Stipendiranje učenika srednjih škola za deficitarna zanimanja i Zakonom o izvršenju Budžeta Tuzlanskog kantona za 2020. godinu.

Član 4.

(Visina stipendije)

(1) Ukupna visina stipendije, po jednom kandidatu, u skladu sa odredbama ove odluke iznosi 900 KM (devetstotinakonvertibilnihmaraka).

(2) Isplata stipendije vršit će se u devet jednakih mjesečnih rata, a visina jedne rate iznosi 100 KM (stotinukonvertibilnih maraka).

Član 5.

(Ukupan broj korisnika stipendije)

(1) Stipendija po ovoj odluci se može odobriti za ukupno 143 kandidata, i to za svako deficitarno zanimanje sa Liste deficitarnih zanimanja za školsku 2020/2021. godinu, minimalno po 10 kandidata.

(2) Izuzetno od stava (1) ovog člana, ukoliko u okviru jednog deficitarnog zanimanja dovoljan broj kandidata ne ispuni uvjete za dodjelu stipendije, u okviru preostalog iznosa

sredstava, a nakon dodjele stipendija u skladu sa stavom (1) ovog člana, pravo na dodjelu stipendije može ostvariti kandidat sa većim brojem bodova, shodno kriterijima utvrđenim odredbama ove odluke, neovisno od vrste zanimanja.

II - USLOVI ZA DODJELU STIPENDIJA

Član 6.

(Uslovi za dodjelu stipendije)

Pravo na dodjelu stipendije ima kandidat pod uslovom:

- a) da je državljanin Bosne i Hercegovine,
- b) da ima prijavljeno mjesto prebivališta na području Tuzlanskog Kantona (u daljem tekstu Kanton), ili da ima prijavljeno mjesto boravišta u statusu raseljene osobe na području Kantona, ili da je prije ostvarenog povratka imao status raseljene osobe na području Kantona,
- c) da je u školskoj 2020/2021. godini prvi put primljen u prvi razred po Konkursu za upis redovnih učenika u prvi razred srednjih škola,
- d) da redovno pohađa prvi razred srednje škole za zanimanja sa utvrđene Liste deficitarnih zanimanja za školsku 2020/2021. godinu i
- e) da ne prima stipendiju od drugog davaoca stipendije, iz bilo kog izvora finansiranja.

III KRITERIJI ZA DODJELU STIPENDIJA

Član 7.

(Kriteriji za dodjelu stipendija)

(1) Rangiranje kandidata za dodjelu stipendije vrši se na osnovu sljedećih kriterija:

- a) općeg uspjeha postignutog u devetom razredu osnovne škole i
- b) materijalnog položaja

Član 8.

(Bodovanje po osnovu ostvarenog uspjeha u devetom razredu osnovne škole)

Po osnovu općeg uspjeha postignutog u devetom razredu osnovne škole kandidatu pripadaju sljedeći bodovi:

- a) odličan uspjeh50 bodova
- b) vrlo dobar uspjeh.....40 bodova
- c) dobar uspjeh.....30 bodova
- d) dovoljan uspjeh20 bodova

Član 9.

(Bodovanje po osnovu materijalnog položaja)

(1) Po osnovu materijalnog položaja kandidatu pripadaju sljedeći bodovi:

- a) kandidat i članovi porodičnog domaćinstva bez prihoda.....50 bodova
- b) kandidat iz porodice korisnika socijalne zaštite.....40 bodova
- c) kandidat i članovi porodičnog domaćinstva čiji su prihodi po članu porodičnog domaćinstva do 30 % prosječne plaće u FBiH.....30 bodova
- d) kandidat i članovi porodičnog domaćinstva čiji su prihodi po članu porodičnog domaćinstva od 31% - 50 % prosječne plaće u FBiH.....20 bodova
- e) kandidat i članovi porodičnog domaćinstva čiji su prihodi po članu porodičnog domaćinstva od 51% - 70 % prosječne plaće u FBiH.....10 bodova
- f) kandidat i članovi porodičnog domaćinstva čiji su prihodi po članu porodičnog domaćinstva preko 70 % prosječne plaće u FBiH.....5 bodova

(2) Pod članom porodičnog domaćinstva, u smislu ove odluke, podrazumijevaju se: roditelji, braća i sestre, očuh, maćeha, usvojitelj, staratelj, djed, nena/baka ako sa kandidatom žive u zajedničkom domaćinstvu.

(3) Ukupan prihod u smislu ovog člana čine prihodi koje članovi porodičnog domaćinstva ostvaruju po osnovu plaća i drugih primanja iz radnog odnosa, starosne, invalidske i porodične penzije, privredne, uslužne i druge djelatnosti i prihodi po osnovu socijalne zaštite.

(4) Kod utvrđivanja ukupnog prihoda po članu porodičnog domaćinstva u obzir se uzima prosječna neto plaća ostvarena u Federaciji Bosne i Hercegovine, u prethodnoj godini, prema zvaničnom podatku Federalnog zavoda za statistiku.

Član 10.

(Prednost pri jednakom broju bodova)

Ukoliko na rang listi dva ili više kandidata ostvare isti broj bodova prednost na rang listi ostvarit će kandidat prema sljedećem redoslijedu:

- a) kandidat sa manjim prihodima po članu porodičnog domaćinstva,
- b) kandidat koji je ostvario veću prosječnu ocjenu u devetom razredu.

IV - POSTUPAK DODJELE STIPENDIJA

Član 11.

(Donošenje odluke i raspisivanje konkursa)

(1) Odluku o raspisivanju konkursa za dodjelu stipendija za deficitarna zanimanja za školsku 2020/2021. godinu donosi Ministarstvo obrazovanja i nauke Tuzlanskog kantona (u daljem tekstu: Ministarstvo).

(2) Tekst konkursa i obrazac prijave na konkurs utvrđuje Ministarstvo.

(3) Konkurs obavezno sadrži sljedeće podatke:

- a) naziv organa koji objavljuje konkurs,
- b) adresu organa kojem se zahtjevi podnose,
- c) uslovi i kriteriji za dodjelu stipendije,
- d) dokazi koje kandidati prilažu uz prijavu na konkurs,
- e) rokovi za prijavu na konkurs,
- f) prava i obaveze kandidata,
- g) način isplate sredstava i
- h) druge eventualno potrebne podatke.

(4) Tekst konkursa se objavljuje na zvaničnoj web stranici Vlade Kantona, od kada počinje teći rok za predaju dokumentacije.

(5) Konkurs iz stava (4) ovog člana informativno se objavljuje i na web stranici Ministarstva, ali objava na web stranici Ministarstva ne utiče na tok trajanja roka za predaju dokumentacije.

Član 12.

(Prijava na konkurs)

(1) Prijave na konkurs sa potrebnom dokumentacijom, podnose se Ministarstvu u roku od 15 dana od dana objavljivanja konkursa na web stranici Vlade Kantona.

(2) Prijava na konkurs se vrši putem prijavnog obrasca, koji se može preuzeti na web stranici Ministarstva i Vlade Kantona i u službenim prostorijama Ministarstva.

(3) Kandidat je uz popunjen prijavni obrazac obavezan dostaviti i:

a) uvjerenje o statusu redovnog učenika u školskoj 2020/2021. godini, sa dokazom da je prvi put upisao prvi razred srednje škole za zanimanja sa utvrđene Liste deficitarnih zanimanja za školsku 2020/2021. godinu (original ili ovjerena kopija),

b) uvjerenje o državljanstvu (original ili ovjerena kopija),

c) dokaz o prijavljenom mjestu prebivališta, odnosno boravišta ne stariji od 60 dana (CIPS obrazac PBA3, original ili ovjerena kopija) ili za lica u statusu povratnika dokaz da je prije ostvarenog povratka imao status raseljene osobe na području Kantona (original ili ovjerena kopija),

d) dokaz o zajedničkom domaćinstvu (kućna lista), ne stariji od 30 dana (original ili ovjerena kopija),

e) ovjerenu kopiju svjedočanstva o završenom IX razredu osnovne škole,

f) izjavu ovjerenu od strane nadležnog gradskog/općinskog organa uprave ili notara da ne prima stipendiju od drugog davaoca stipendije, iz bilo kog izvora finansiranja,

g) dokaz o materijalnom položaju (original ili ovjerena kopija) i to:

- kandidat bez prihoda po članu porodičnog domaćinstva - uvjerenje Službe za zapošljavanje,
- kandidat iz porodice korisnika socijalne zaštite - potvrda/uvjerenje nadležnih organa,
- kandidat sa prihodima po članu porodičnog domaćinstva - dokazi o zaposlenju i visini stalnih izvora prihoda za sve zaposlene članove porodičnog domaćinstva (original ili ovjerena kopija), koji se dostavljaju alternativno u zavisnosti od načina sticanja prihoda, i to: tri posljednje platne liste ili uvjerenje poslodavca o prosjeku tri posljednje mjesečne plate, ček od PIO penzije, a za lica koja imaju registrovanu samostalnu djelatnost odgovarajući dokaz u zavisnosti od vrste djelatnosti. Za nezaposlene članove porodičnog domaćinstva kandidat dostavlja dokaz o nezaposlenosti – uvjerenje Službe za zapošljavanje.

Član 13.

(Imenovanje i sastav Komisije)

- (1) Konkursnu proceduru provodi Komisija koju imenuje ministrica obrazovanja i nauke Tuzlanskog kantona (u daljem tekstu: ministrica), u roku od 15 dana od dana isteka roka za podnošenje prijava na konkurs.
- (2) Komisija ima tri člana, imenovanih ispred Ministarstva.
- (3) Komisija za svoj rad odgovara ministrici.
- (4) Članovi Komisije ne mogu biti lica čiji članovi porodičnog domaćinstva učestvuju u postupku za dodjelu sredstava po ovoj odluci.
- (5) Komisija je dužna razmotriti prijave u pogledu blagovremenosti i potpunosti, utvrditi broj bodova po svakom od osnova i najkasnije u roku od 30 dana od dana isteka roka za podnošenje prijava na konkurs sačiniti jedinstvenu rang listu i istu objaviti na web stranici Vlade Kantona i Ministarstva.
- (6) Rang lista kandidata obavezno sadrži:
 - a) prezime, ime jednog roditelja i ime kandidata,
 - b) broj bodova po svakom od utvrđenih osnova,
 - c) ukupan broj bodova po svim osnovama i
 - d) pouku o pravnom lijeku sa tačno naznačenim rokom za ulaganje prigovora.
- (7) Neblagovremene i nepotpune prijave Komisija neće uzimati u razmatranje, a prijavljeni kandidati o istom se obavještavaju sačinjavanjem posebne liste.

Član 14.

(Postupak po prigovoru i donošenje konačne rang liste)

- (1) Na liste iz člana 13. stav (5) i (7) ove odluke, nezadovoljni kandidati mogu podnijeti prigovor u roku od 8 dana od dana objavljivanja listi na web stranicama Vlade Kantona i Ministarstva.
- (2) Prigovor se podnosi Ministarstvu u pisanoj formi.
- (3) O podnesenim prigovorima odlučuje ministrica u roku od 15 dana od dana isteka roka za podnošenje prigovora.
- (4) Nakon okončanja postupka po prigovorima konačnu rang listu kandidata utvrđuje ministrica.

Član 15.

(Ugovor o stipendiranju)

- (1) Na osnovu konačne rang liste, ministrica sa kandidatom, odnosno roditeljem/starateljem kandidata zaključuje ugovor o stipendiranju, kojim se bliže uređuju međusobna prava i obaveze.
- (2) Ugovor iz stava (1) ovog člana zaključuje se u roku od 30 dana od dana isticanja konačnih rang listi na web stranicama Vlade Kantona i Ministarstva.
- (3) Ukoliko kandidat, odnosno roditelj/staratelj, u roku iz stava (2) ovog člana ne potpiše ugovor kandidat gubi pravo na dodjelu stipendije, a stipendija se dodjeljuje prvom sljedećem kandidatu sa rang liste kandidata koji nije ostvario pravo na dodjelu stipendije.

V - NAČIN ISPLATE STIPENDIJA

Član 16.

(Isplata stipendije)

- (1) Stipendija se isplaćuje u devet jednakih mjesečnih rata.
- (2) Isplata stipendije vrši se putem štedne knjižice ili računa korisnika stipendije otvorenog kod banke na području Federacije Bosne i Hercegovine.
- (3) Evidenciju o korisnicima stipendija vodi Ministarstvo.

Član 17.

(Gubitak prava na stipendiranje)

Korisnik stipendije gubi pravo na dalju isplatu stipendije ako u toku školske godine:

- a) napusti redovno školovanje u prvom razredu škole,
- b) bude mu izrečena disciplinska mjera isključenja iz škole,
- c) po nekom drugom osnovu prestane mu status redovnog učenika,
- d) ako se naknadno utvrdi da su prilikom prijave na konkurs iznesene netačne činjenice na osnovu kojih mu je stipendija dodijeljena (materijalni položaj, izjava da ne prima stipendiju od drugog davaoca i dr.).

Član 18.

(Obaveze primaoca stipendije)

Po nastupanju sljedećih okolnosti korisnik stipendije obavezan je obavijestiti Ministarstvo u roku od:

- a) trideset dana od dana nastupanja okolnosti iz člana 17. alineja a), b) i c),
- b) u roku od 15 dana po nastaloj okolnosti u slučaju promjene adrese stanovanja,
- c) u roku od 15 dana od dana zaključivanja ugovora o stipendiranju sa drugim davaocem stipendije.

VI – ZAVRŠNE ODREDBE

Član 19.

(Stupanje na snagu)

Ova Odluka stupa na snagu danom donošenja, a objavit će se u „Službenim novinama Tuzlanskog kantona“.

BOSNA I HERCEGOVINA
Federacija Bosne i Hercegovine
TUZLANSKI KANTON
V L A D A

Broj: _____
Tuzla, _____

PREMIJER KANTONA

prof. dr. Denijal Tulumović

OBRAZLOŽENJE

Na potrošačkoj jedinici 24010026 - stipendiranje učenika srednjih škola za deficitarna zanimanja, u 2020. godini, planirana su sredstva za stipendiranje učenika srednjih škola za deficitarna zanimanja.


Shodno Odluci o utvrđivanju Liste deficitarnih zanimanja za školsku 2020/2021. godinu, broj: 10/1-34-9156-1/20 od 27.05.2020. godine, deficitarna zanimanja za školsku 2020/2021. godinu su: zavarivač, zidar-fasader-izolater, krojač, konobar, kuhar, plinski i vodoinstalater, autoelektričar, stolar, tapetar, rukovalac rudarske mehanizacije površinskog kopa.

Pravo na dodjelu stipendije imali bi kandidati u statusu redovnog učenika koji su prvi puta upisali prvi razred srednje škole za zanimanje sa Liste deficitarnih zanimanja za školsku 2020/2021. godinu.

Pravo na stipendiju shodno planiranom iznosu sredstava moglo bi ostvariti cca 143 kandidata. Iznos Stipendije za jednu školsku godinu iznosio bi 900 KM po kandidatu, a stipendija bi se isplaćivala u devet jednakim mjesečnih rata po 100 KM po jednoj rati.

S obzirom da se u skladu sa članom 78. stav (6) Zakona o izvršenju Budžeta TK za 2020. godinu ("Službene novine TK", broj: 16/19 i 07/20) sredstva za stipendiranje učenika srednjih škola za deficitarna zanimanja raspoređuju po raspisanom javnom konkursu, u skladu sa kriterijima koje na prijedlog Ministarstva obrazovanja i nauke Tuzlanskog kantona donosi Vlada Tuzlanskog kantona, molimo Vladu Tuzlanskog kantona da razmotri i donese Odluku o utvrđivanju uslova, kriterija, postupka i načina isplate stipendija redovnim učenicima prvih razreda srednjih škola koji upišu zanimanje sa Liste deficitarnih zanimanja za školsku 2020/2021. godinu.

Ministarstvo obrazovanja i nauke Tuzlanskog kantona



Broj: 07/1-11- 17216/20
Datum, 10.09.2020. godine,

TUZLANSKI KANTON
Ministarstvo obrazovanja i nauke

PREDMET: Mišljenje, dostavlja se

Ministarstvo finansija zaprimilo je vaš akt broj: 10/1-34-047260-1/20 od 08.09.2020. godine, u čijem prilogu je dostavljen prijedlog Odluke o utvrđivanju uslova, kriterija, postupka i načina isplate za dodjelu stipendija redovnim učenicima prvih razreda srednjih škola koji upišu zanimanja sa Liste deficitarnih zanimanja za školsku 2020./2021. godinu (u daljem tekstu: prijedlog Odluke), radi davanja mišljenja u pogledu finansijskih sredstava potrebnih za realizaciju prijedloga Odluke, a u skladu sa članom 30. stav 1. alineja c). Poslovnika o radu Vlade Tuzlanskog kantona („Službene novine Tuzlanskog kantona“ br: 7/05, 7/07, 11/08 i 16/13).

Na osnovu uvida u dostavljeni dokument Ministarstvo finansija daje slijedeće mišljenje u pogledu finansijskih sredstava potrebnih za realizaciju prijedloga Odluke:

MIŠLJENJE

U skladu sa odredbama Pravilnika o proceduri za izradu izjave o fiskalnoj procjeni zakona, drugih propisa i akata planiranja na budžet („Službene novine Federacije BiH“ br: 34/16 i 15/18), predlagač je dostavio Obrasce Izjave o fiskalnoj procjeni IFP-NE, u kojem je istakao da realizacija prijedloga Odluke neće zahtijevati dodatna sredstva u Budžetu Tuzlanskog kantona za 2020. godinu.

Prijedlogom Odluke utvrđuju se uslovi, postupak i način isplate za dodjelu stipendija redovnim učenicima prvih razreda srednjih škola koji upišu zanimanja sa Liste deficitarnih zanimanja za školsku 2020./2021. godinu.

Sredstva za realizaciju prijedloga Odluke planirana su u Budžetu Tuzlanskog kantona za 2020. godinu („Službene novine Tuzlanskog kantona“ br: 16/19 i 7/20), na potrošačkom mjestu 26010026 – Stipendiranje učenika srednjih škola za deficitarna zanimanja na ekonomskom kodu 614200 – Tekući transferi pojedincima u iznosu od 80.000,00 KM.

Imajući u vidu navedeno, Ministarstvo finansija je mišljenja da dostavljen prijedlog Odluke o utvrđivanju uslova, kriterija, postupka i načina isplate za dodjelu stipendija redovnim učenicima prvih razreda srednjih škola koji upišu zanimanja sa Liste deficitarnih zanimanja za školsku 2020./2021. godinu, **ne zahtijevaju dodatna sredstva** u Budžetu Tuzlanskog kantona za 2020. godinu, kako je navedeno u Obrascu Izjave o fiskalnoj procjeni IFP-NE od strane predlagača, te da isti može ići u dalju proceduru usvajanja.

S poštovanjem,


Dostavljeno:

1x Naslovu

1x Vladi TK

1x Evidencija

1x a/a



MINISTAR

Suad Mustajbašić, dipl.ecc.